

BRČKO DISTRIKT
BOSNE I HERCEGOVINE
V L A D A



БРЧКО ДИСТРИКТ
БОСНЕ И ХЕРЦЕГОВИНЕ
В Л А Д А

ИНФО

April / Svibanj / Јун, 2023. god.



Održana konferencija “Brčko distrikt BiH- Izazovi energetske tranzicije”

Na inicijativu Zelenog kluba, a u saradnji sa Skupštinom i Vladom Brčko distrikta BiH, održana je tematska konferencija pod nazivom „Brčko distrikt BiH izazovi energetske tranzicije“. Konferenciji su prisustvovali zastupnici Parlamenta sa svih nivoa vlasti, predstavnici izvršne i zakonodavne vlasti Brčko distrikta BiH, institucija i civilnog društva.

Uvodnim riječima prisutnima su se obratili gradonačelnik Brčko distrikta BiH prim. dr. Zijad Nišić, predsjednik Skupštine Siniša Milić, predsjednik Zelenog kluba poslanika Parlamenta BiH Saša Magazinović te, putem videolinka, supervizor za Brčko Jonathan Mennuti.

Uz prisustvo stručnjaka i predstavnika različitih institucija i međunarodnih organizacija, na konferenciji su razmatrane važne teme koje se tiču energetske tranzicije i reformi neophodnih u oblasti općeg zelenog dogovora s fokusom na energiju, transport, energetska efikasnost, obnovljive izvore

energije i urbanu mobilnost.

Pored činjenice da je Brčko distrikt BiH usvojilo Zakon o obnovljivim izvorima energije koji je u ranoj fazi implementacije, ukazano je na potrebu nastavka uređenja zakonodavnog okvira i izrade podzakonskih akata.

Naglašeno je da jasno iskazano opredjeljenje mora biti praćeno konkretnim aktivnostima i izdvajanjima novčanih sredstava u budžetu Brčko distrikta BiH u korist energetske efikasnosti i obnovljivih izvora energije.

Na konferenciji je iskazana spremnost donosilaca odluka da, bez obzira na političku orijentaciju, rade zajedno kako bi osigurali da međunarodno preuzete obaveze bile ispunjene u kraćem vremenskom periodu.

Konferencija je održana uz podršku otvorenog regionalnog fonda i podrške zelenim parlamentarnim grupama u regiji od strane GIZ-a.





Gradonačelnik Nišić primio predstavnike češke ambasade

Gradonačelnik Brčko distrikta BiH Zijad Nišić upriličio je sastanak sa predstavnicima Ambasade Republike Češke u BiH i Češke razvojne saradnje Brčko distrikta BiH.

Na sastanku kome su prisustvovali konzul Češke u BiH i rukovodilac Odjeljenja za razvojnu saradnju Štepan Šantruček, predstavnica Češke razvojne agencije Sara Miličić, kao i predstavnici brčanskog Razvojno-garantnog fonda i Vlade Brčko distrikta, razgovaralo se o implementaciji projekta Unaprjeđenje socioekonomskih integracija marginalizovanih lica na tržištu rada i smanjene negativne posljedice socijalne isključenosti kroz prekvalifikacije, doškolovanje, podršku startup preduzećima, promociju i marketing, obuke i razvoj nezaposlenih, besplatnu pravnu pomoć.

Gradonačelnik Nišić je ovom prilikom izrazio očekivanje da će u Brčkom uskoro biti donesen i Zakon o invalidima i rehabilitaciji ove populacije koji će dati pretpostavke da ovaj projekat dobije šansu u Brčko distriktu.

„Ovaj zakon je vrlo kompatibilan, nije uslov ali godi ovoj inicijativi, tako da će i naša aplikacija imati veću šansu kada se bude razmatrala po tipu konkursa, te da će Brčko dobiti taj novac. Radni centar, to predviđa zakon, i to je nešto što ćemo mi iz lokalne zajednice potencirati i ako ne bude u programu koji predviđa ova fondacija, mi ćemo to svakako učiniti. Ja se već dugo za to zalažem“, istakao je Nišić.

Konzul Češke u BiH i rukovodilac Odjeljenja za razvojnu saradnju Štepan Šantruček, istakao je da je ovaj projekat, prošle godine, predložio brčanski

Razvojno-garantni fond.

„Radi se o projektu koji je namjenjen za socioekonomsku inkluziju marginalizovanih grupa, to su osobe sa intelektualnim poteškoćama i osobe sa invaliditetom. BiH je jedna od prioriternih država razvojne saradnje Češke republike i kroz tu razvojnu saradnju jedan od fokusa jeste upravo socioekonomska inkluzija. Češka republika ima iskustvo u tom polju, u prošlom periodu smo implemenrirali jedan projekat u Federaciji BiH, radili smo i projekat u RS-u, i nadam se da ćemo postići rezultate i u Brčko distriktu“, naglasio je Šantruček.

Projekat je vrijedan milion eura, a u Brčkom bi trebalo da bude realizovan uz saradnju sa Razvojno-garantnim fondom Brčko distrikta BiH i Zavodom za zapošljavanje Brčko distrikta BiH.

„Ovo je značajna inicijativa koja će donijeti dugoročne benefite, ali i neekonomske naravi to će biti prije svega jedna socijalna inkluzija ovih ranjivih grupa. Nadam se da će se naša saradnja nastaviti i da će ovo na neki način demotivisati ove ljude da oslaze iz BiH, i da će biti u službi sveukupnog razvoja“, rekao je ovom prilikom šef Jedinice za implementaciju projekata iz međunarodnih fondova Razvojno-garantnog fonda Zlatan Musić.

Drugog dana boravka u Brčkom, predstavnici Ambasade Republike Češke u BiH zajedno sa kolegama iz Češke razvojne agencije, razgovarali su sa odgovornim u Odjeljenju za privredni razvoj, sport i kulturu, Odjeljenja za evropske integracije i međunarodnu saradnju te Zavoda za zapošljavanje.

Brčko posjetila visoka delegacija Svjetske banke

Direktorica Svjetske banke za Zapadni Balkan Sjaočing Ju i direktor Svjetske banke za BiH i Crnu Goru Kristofer Šeldon boravili su u jednodnevnoj posjeti Brčko distriktu BiH i tim povodom održali sastanak sa gradonačelnikom Brčko distrikta BiH Zijadom Nišićem.

Posjeta predstavnika Svjetske banke rezultat je nastojanja direktorice Sjaočing Ju da razgovara sa predstavnicima Brčko distrikta BiH o realizaciji pet podprojekata koji bi se u Brčko distriktu BiH trebali da finansiraju sa 49,9 miliona KM kreditnih sredstava te banke.

Gradonačelnik Nišić je podsjetio goste o kojim projektima je riječ i u kojoj je fazi priprema dokumentacije potrebne za njihovu implementaciju.

„Riječ je o sanaciji deponije, izgradnji Centra za upravljanje čvrstim otpadom, regulaciji vodotoka rijeke Blizne i gornjeg toka rijeke Brke, te izgradnji biciklističke staze desnom obalom rijeke Save. Skup ovih pet potprojekata je kompaktan i zahvata više sfera života, a ono čemu se nadam, i što bih želio, je da njihova implementacija bude u našem mandatu. Mi ćemo upotrijebiti sve stručne resurse da to i realizujemo“, istako je gradonačelnik Nišić.

Direktorica Sjaočing Ju je pohvalila Vladu za podršku i trud učinjen za uspostavljanje Jedinice za

implementaciju projekata u Brčko distriktu BiH.

„Ovi potprojekti čiji je cilj opšte dobro, uklapaju se u viziju projekata koje Svjetska banka želi podržati“, poručila je direktorica Ju.

Njen kolega, koji se nalazi na čelu Svjetske banke u BiH i Crnoj Gori Kristofer Šeldon rekao je da predstoje pregovori o kreditnom aranžmanu, koji se očekuju u toku narednog mjeseca“.


Glavni koordinator Vlade Brčko distrikta Željko Antić je upoznao delegaciju Svjetske banke u kojoj je fazi izrada dokumentacije ovih potprojekata i pribavljanje građevinskih dozvola.

„Želio bih da barem četiri, od pet kandidovanih projekata, bude implementirano do kraja tekućeg mandata“, istakao je Antić

Nakon razgovora u gradskoj Vijećnicidelegacija Svjetske banke sa predstavnicima zakonodavne i izvršne vlasti Brčko distrikta BiH, obišla je lokalitet gdje se planira da realizuje projekat „Sanacija i zatvaranje deponije u Brčko distriktu BiH“, kao i izletišta Ficibajerkao dio projekta „Izgradnja pješačke i biciklističke staze desnom obalom rijeke Save“.

Sastanku su još prisustvovali šef Odjeljenja za komunalne poslove u brčanskoj Vladi Majazudin Vehabović, kao predstavnici Jedinice za implementaciju projekata iz međunarodnih fondova.





U Vijećnici upriličen prijem za veleposlanika Ujedinjenog Kraljevstva

Gradonačelnik Brčko distrikta BiH prim. dr. Zijad Nišić i dogradonačelnik dr. Anto Domić zajedno su s dopredsjednikom Skupštine Ivom Filipovićem, upriličili prijem prigodom posjeta veleposlanika Ujedinjenog Kraljevstva Velike Britanije i Sjeverne Irske Nj. E. Juliana Reillyja.

Radi se o prvom posjetu veleposlanika Reillyja, nakon što je u srpnju 2022. godine stupio na spomenutu funkciju, a prethodno je obavljao neke od najviših političkih dužnosti.

Dužnosnici su veleposlanika upoznali s trenutnim i budućim aktivnostima i projektima na području

Distrikta, dotaknuvši se infrastrukturnih projekata, revitalizacije Luke Brčko, obnove mosta Brčko Gunja, statusa mladih, ali i pokrenutih procesa kada je riječ o obnovljivim izvorima energije, što je dobilo posebne pohvale veleposlanika. On je ujedno istakao da je upoznat s potencijalima ovog područja i olakšicama koje grad Brčko nudi za inozemne investitore.

Nakon sastanka zvaničnici su zajedno s veleposlanikom obišli izgrađeni Spomenik civilnim žrtvama rata u Brčkom.

Одобрени приједлози за једнократну помоћ

На окончаној 90. редовној сједници Влада Брчко дистрикта Босне и Херцеговине усвојила је два приједлога Одјељења за здравство и остале услуге.

Наиме, Влада је усвојила Одлуку о одобравању Програма утршка средстава за додјелу једнократне новчане помоћи у стамбеном збрињавању породице погинулог борца, ратног војног инвалида и члана породице ратног војног инвалида у Брчко дистрикту Босне и Херцеговине, чиме су

одобрена средства у висини од 600.000,00 КМ. Други приједлог Одјељења, који је Влада усвојила, јесте Одлука о одобравању Програма утршка средстава за додјелу једнократне новчане помоћи у стамбеном збрињавању демобилисаног борца и члана породице умрлог демобилисаног борца у Брчко дистрикту Босне и Херцеговине. За овај програм издвојена су, такође, средства у висини од 600.000,00 КМ.



Članovi Vlade Brčko distrikta BiH svečano položili zakletvu



Članovi Vlade Brčko distrikta Bosne i Hercegovine su na 13. vanrednoj sjednici Skupštine položili svečanu zakletvu. Pored već poznatih imena, zakletvu su svečano položili i novi šefovi Odjeljenja: Suvad Mašić, šef Odjeljenja za prostorno planiranje i imovinskopravne poslove, Senad Tufekčić, šef Odjeljenja za stručne i administrativne poslove, te Asmir Mujanović, šef Odjeljenja za zdravstvo i ostale usluge.

Upriličen sastanak povodom Dana slobode medija

Povodom Svjetskog dana slobode medija, graonačelnik Brčko distrikta Bosne i Hercegovine Zijad Nišić zajedno sa zamjenikom gradonačelnika Antom Domićem i glavnim koordinatorom Vlade Željkom Antićem upriličio je sastanak sa predstavnicima lokalnih brčanskih medija.

Prisutni su na sastanku razgovarali o uslovima rada novinara, njihovoj odgovornoj ulozi posredovanja između vlasti i građana, kao i potrebi donošenja zakonske regulative u oblasti medija.

„Novinarstvo je jedna od najčasnijih profesija koju izuzetno cijenim i koja je vrlo odgovorna s obzirom da vijest formira svijest i da ste vi medij između nas i građana, s razlogom se zovete „sedma sila“. S obzirom

da smo svjesni okolnosti u kojima radite i djelujete, nastojat ćemo da ovu oblast regulišemo zakonom i tako zajednički učinimo veliki pomak u razvoju demokratije“ izjavio je u svom obraćanju gradonačelnik Nišić.

„Prije svega želim da se zahvalim gradonačelniku koji je prvi od osnivanja Distrikta za Dan slobode medija pozvao lokalne medije da razgovaramo o stanju u oblasti medija i najviše se potenciralo donošenje zakona o medijima koji bi bolje regulisao ovu oblast u više segmenata“ izjavio je Adis Mujdanović, glavni urednik portala Plural.ba, te dodao da očekuje transparentnije finansiranje medija.



Upriličen prijem za ambasadoricu Švedske u BiH

Gradonačelnik Brčko distrikta Bosne i Hercegovine Zijad Nišić i zamjenik gradonačelnika Anto Domić u Gradskoj vijećnici upriličili su prijem za ambasadoricu Švedske u Bosni i Hercegovini Nj. e. Johanna Strömquist.

Ambasadorica Strömquist iskazala je svoje zadovoljstvo posjetom Distriktu i razgovorom o projektima koji se tiče razvoja i evropskih integracija Bosne i Hercegovine.

„Brčko distrikt BiH je prvak u implementaciji reformi i u tom smislu se nadamo da će nastaviti da bude pozitivni primjer ostatku države Bosne i Hercegovine, naročito u kontekstu EU integracija. Također, pošto je Švedska jedan od glavnih donatora raznim projektima u BiH, danas smo tu da obidemo zgrade koje su obnovljene uz pomoć i podršku Švedske u Brčkom. Kao što je poznato, Švedska predsjedava Vijećem EU od 1. januara i iz tog razloga akcenat je stavljen na EU integracije. Kandidatski status za pridruživanje EU je zaista ogromna prilika za BiH i nadamo se da će BiH iskoristiti ovu šansu i podršku koja joj se pruža“,

izjavila je ambasadorica tokom svog obraćanja novinarima.

Gradonačelnik Zijad Nišić naglasio je važnost pomoći koju je do sada Švedska pružila Brčko distriktu BiH, naročito u projektu utopljavanja objekata kao i budućoj podršci u projektu energetske tranzicije.

„Jedan od uslova pristupanju EU je energetska tranzicija, koja ima tri faze: prva faza je kreiranje vizije, druga faza je usvajanje dokumenata koje je Brčko usvojilo prije nekoliko godina. Najteža faza je treća faza, a to je realizacija projekta, i ona predstavlja jednu transformaciju privrede i društva u tehnološkom, privrednom, ekonomskom pa čak i psihološkom smislu. Mi očekujemo od naše gošće da iz Brčkog ponese jednu činjenicu i jednu sugestiju, pa evo i molbu da subvencioniranja koja dolaze iz EU budu proporcionalna broju stanovnika, a ne veličini teritorija, jer u dosadašnjim projektima podrške Brčko distrikt BiH u toj distribuciji dobije 1% pomoći što nije ekvivalent njegovom broju stanovnika“, izjavio je Nišić.



Gradonačelnik Nišić razgovarao sa Elmedinom Konakovićem i Kemalom Ademovićem

Gradonačelnik Brčko distrikta Bosne i Hercegovine prim. dr. Zijad Nišić upriličio je sastanak u Gradskoj vijećnici sa gosp. Elmedinom Konakovićem, ministrom vanjskih poslova Bosne i Hercegovine i gosp. Kemalom Ademovićem, prvim zamjenikom predsjedavajućeg Doma naroda Parlamentarne skupštine Bosne i Hercegovine.

Tom prilikom, zvaničnici su se obratili novinarima kako bi pojasnili teme današnjeg sastanka.

„Mi od ovog susreta očekujemo da se unaprijedi, a prije svega stabilizira, politički status Brčko distrikta Bosne i Hercegovine, a onda svakako i ekonomski razvoj. Mi smo našim gostima predložili da je Brčko dio velikih i međunarodno značajnih projekata i nastojat ćemo da dobijemo podršku za sprovođenje istih, pogotovo za projekat Luka koji je odgovoran za jedan veliki razvoj riječnog transporta važan za cijeli region, i tu nam je potrebna pomoć države Bosne i Hercegovine“ izjavio je gradonačelnik Zijad Nišić.

On je dodao da će ovi razgovori biti vrlo korisni za cijelu društvenu zajednicu kao i da je upravo posjeta najvišeg državnog nivoa Brčko distriktu BiH, poruka o njegovoj važnosti za dobrobit svih građana u BiH.

Ministar Elmedin Konaković izrazio je svoje zadovoljstvo posjetom, kazavši da se radi o mjestu koje je predmet političkog i ljudskog interesovanja.

„Ovdje smo da pružimo snažnu podršku

novooizabranom gradonačelniku i od srca mu čestitam i nadam se da ćemo značajno popraviti ambijent u kojem ljudi u BiH žive, te na taj način motivisati mlade ljude da svoju sreću i budućnost traže na našim prostorima“ kazao je ministar Konaković, istaknuvši buduću podršku ministarstva.

„Želim da izrazim nesebičnu podršku i kao ministar u Vijeću ministara i znam da ćemo sigurno sa nivoa Vijeća ministara uspostaviti još bolju saradnju. Upoznat sam o infrastrukturnim projektima i mogućnostima koje se nude na ovom prostoru i mislim da je vrijeme da za naše prioritete stavimo ono što brine naše sugrađane, a to su ekonomija i reforme u oblastima obrazovanja, zdravstva i slično“, dodao je Konaković.

Čestitkama gradonačelniku Nišiću pridružio se i gosp. Ademović, izrazivši svoja očekivanja od buduće izvršne vlasti Distrikta.

„Čestitam gradonačelniku i njegovoj vladi na imenovanju i očekujemo da će transparentnije i brže provesti zacrtane projekte u budžetu Brčko distrikta BiH, kojem je do sada manjkalo transparentnosti. S toga se nadam i očekujem da će se u značajnoj mjeri popraviti transparentno trošenje sredstava budžeta Brčko distrikta BiH“ izjavio je Ademović.

Zvaničnici su, također, iskoristili priliku da upute čestitke povodom vjerskih blagdana Uskrsa, Vaskrsa i Ramazanskog bajrama.





Potpisan Sporazum o prestanku štrajka zdravstvenih radnika

Nakon intenzivnih sastanaka koji su trajali od sredine mjeseca marta, u Gradskoj vijećnici potpisan je sporazum između Vlade Brčko distrikta Bosne i Hercegovine i pregovaračkog tima štrajkačkog odbora zdravstvenih radnika, čime je prekinut prethodno pokrenuti štrajk.

„Poslije dugih pregovora koji su se odvijali kroz zasjedanja Vlade, vanredna zasjedanja Vlade, konsultacije sa štrajkačkim odborom mi smo jučer dogovorili, prihvatili zahtjev zdravstvenih radnika i prilagodili ekonomskom realitetu, tako da od jučer ne postoji štrajk zdravstvenih radnika u punom kapacitetu i nadamo se da smo izašli u susret i zdravstvenim radnicima, ali prije svega to je bila imperativna obaveza prema građanima Brčko distrikta BiH, tako da će liječenje naših građana biti neometano i u punom kapacitetu“, kazao u izjavi za medije gradonačelnik Brčko distrikta BiH Zijad Nišić.

„Prethodnih dana dobili smo na uvid prijedlog rješenja od strane gradonačelnika i Vlade, što je bila konačna ponuda Vlade za rješavanje ovog problema, te je štrajkački odbor ponudu ocijenio kao dobru i ona se prethodnih dana razmatrala u okviru JZU. S ovim dokumentom praktično su otklonjene sve prepreke i već smo u ovom operativnom dijelu još

jučer dali instrukcije da sve službe JZU počnu raditi u svom punom kapacitetu na korist svim korisnicima naših usluga“, izjavio je predsjednik štrajkačkog odbora dr. Samir Mujkić.

Šef Odjeljenja za zdravstvo i ostale usluge Asmir Mujanović osvrnuo se na ulogu odjeljenja u ovom procesu.

„Ono što je važno napomenuti, a ne tiče se samo materijalnih prava radnika, jeste to da Vlada Brčko distrikta BiH putem odjeljenja vodi računa i o materijalno-tehničkoj osposobljenosti JZU i svakako treba napomenuti da je u procesu rekonstrukcija hirurgije za koju je zaključen ugovor na vrijednost veću od milion i sto hiljada maraka, raspisan je tender za nabavku dva RTG aparata, dobili smo informaciju da su dva sanitetska vozila stavljena na raspolaganje i da trebamo izvršiti njihovu primopredaju za koja su izdvojena sredstva 500.000,00 KM. Svako od tih vozila predstavlja mini ambulantu, tako da u tom smislu i u narednom periodu Vlada će u kontinuitetu da prati i da pokušava da udovolji svim zahtjevima JZU u pogledu materijalno-tehničkog osposobljavanja za rad medicinskog osoblja, a sve s ciljem pružanja što kvalitetnije zdravstvene zaštite građana Distrikta“, izjavio je Mujanović.

Održana prezentacija projekta onkološke bolnice u Brčko distriktu BiH

Projekat onkološke bolnice u Brčko distriktu Bosne i Hercegovine pred članovima Vlade, Skupštine, Fonda zdravstvenog osiguranja i JZU „Zdravstveni centar Brčko“ prezentovan je u prostorijama Skupštine.

Gradonačelnik Brčko distrikta BiH Zijad Nišić kazao je da se radi o projektu izgradnje onkološkog instituta, koji je neophodan za građane Distrikta, s obzirom na broj onkoloških pacijenata na ovom području.

„U svijetu je trenutna ekspanzija onkoloških oboljenja, gdje broj smrtnosti godišnje dostiže i 10 miliona stanovnika. Iako u Brčkom nemamo zvanično objavljene statistike, otprilike 250 do 500 pacijenata na godišnjem nivou otkrije da ima onkološko oboljenje. Usluge radioterapije ne postoje u Brčkom, nego ih koristimo u regionalnim centrima. Nažalost, ta se terapija često odgađa zbog malih kapaciteta, zbog

kvarova na aparatima, a upravo to odlaganje terapije dovodi do lošije prognoze i statistike u pogledu smrtnosti pacijenata“, izjavio je gradonačelnik Nišić, dodavši da vjeruje da će ovaj projekat imati odobrenje i od strane Vlade i Skupštine kako bi se moglo ubrzano pristupiti njegovoj realizaciji.

Prezentaciju je pripremio i održao Marijan Bilić, menadžer firme „Affidea“ iz Nizozemske, koji je ukratko predstavio istu. „Radi se o kompaniji koja radi u 15 zemalja Evrope. Mi ne prodajemo medicinsku opremu nego pravimo zdravstvene kapacitete koji su vezani za radiološku dijagnostiku, polikliniku i onkologiju. Imamo 330 različitih zdravstvenih kapaciteta u tih 15 zemalja, s 11.000 zaposlenih i s preko 1.500 komada instalirane opreme“, kazao je Bilić.



У Градској вијећници потписан Меморандум о сарадњи између ЈП „Лука Брчко“ и румунске „Лука Констанца“

У Градској вијећници уприличено је потписивање Меморандума разумијевања у области транспорта унутрашњим пловним путевима између ЈП „Лука Брчко“ и Националне компаније „Управа поморских лука“ Констанца из Румуније.

Градоначелник Брчко дистрикта БиХ Зијад Нишић, главни координатор Владе Жељко Антић и шеф Одјељења за привредни развој, спорт и културу Перо Гудељевић одржали су, заједно с представницима Луке Брчко и Привредне коморе Брчко, састанак с представницима Луке Констанца и амбасадором Румуније у БиХ, Њ.Е. Антоном Пакуретуом.

Меморандум о сарадњи потписали су директор Луке Брчко г. Перица Јосић и комерцијални директор Луке Констанца г. *George-Gabriel Visan*.

„Румунија је једна од земаља која највише улаже у Босну и Херцеговину, а примјер томе и склапање меморандума, који ће имати бенефите не само за Брчко дистрикт БиХ и Босну и Херцеговину, него и за регион, па и за цијелу Европу, с обзиром да се ради о ријечном саобраћају који је увезан с црногорским сливом. Захваљујем се нашим пријатељима из

Румуније и очекујем да процес реализације буде динамичан како би Брчко дистрикт БиХ што прије био на мапи регионалних важећих ријечних токова“, изјавио је градоначелник Зијад Нишић.

„Желим се захвалити на лијепим ријечима о билатералној сарадњи Румуније и БиХ. Ово је важан тренутак и за Румунију, и за Босну и Херцеговину, свакако и за Брчко дистрикт БиХ, јер је потписивањем овог меморандума олакшано другим компанијама да се укључе у овај пројекат ријечног транспорта“, истакао је амбасадор Пакурету.

„Размијенићемо наше искуство у смислу потраживања фондова из ЕУ за пројекте, развијати пројекте инфраструктуре, транспорта, покушаћемо привући и нове лучке оператере као и да се међусобно промовишемо на различитим свјетским догађајима“, казао је комерцијални директор Луке Констанца г. *Visan*.

„Познато је да је Лука Брчко тренутно у фази ревитализације уз помоћ средстава из ЕБРД и вјерујем да ће се њеним завршетком остварити још боља конекција и сарадња с једном овако важном луком“, додао је директор брчанске Луке Перица Јосић.



Upriličen sastanak s članom Predsjedništva BiH Denisom Bećirovićem i načelnikom Općine Novi Grad Sarajevo Semirom Efendićem

Čelnici Distrikta u Gradskoj vijećnici upriličili su sastanak s članom Predsjedništva Bosne i Hercegovine dr. Denisom Bećirovićem i načelnikom Općine Novi Grad Sarajevo Semirom Efendićem.

Tom prilikom, gradonačelnik Zijad Nišić je zajedno s glavnim koordinatorom Vlade Željkom Antićem, predsjednikom Skupštine Sinišom Milićem i potpredsjednikom Ivom Filipovićem podijelio informacije o aktuelnim dešavanjima, naglašavajući da je pomoć državnih institucija Brčko distriktu BiH neophodna za razvoj, ne samo Distrikta, nego i BiH.

„Naši gosti, dr. Bećirović i gosp. Efendić, došli su u posjetu kako bi vidjeli kakve su perspektive Distrikta, kakav je njegov ambijent i razvojna mogućnost, i mi računamo na unutrašnje ekonomske, finansijske i političke integracije, koje mogu biti jedan od podsticaja na putu ka Evropskoj uniji. Drago mi je da dijelimo stavove s članom Predsjedništva BiH, njegova pomoć nam je svakako potrebna kako bismo imali uspješnu zajedničku budućnost, a gosp. Efendić nam je prenio svoja iskustva i način na koji vodi lokalnu zajednicu koja već ima attribute evropskih metropola“, izjavio je

gradonačelnik Nišić.

Denis Bećirović kazao je da će njegova posjeta biti podsticaj da se postigne kvalitetnija saradnja Brčko distrikta BiH s državnim organima vlasti BiH.

„U vrlo kratkom vremenu, Predsjedništvo Bosne i Hercegovine je odobrilo grant za Luku Brčko u iznosu od 3 miliona eura. To je jedna konkretna stvar vezana za Distrikt i danas smo bili saglasni da sve projekte koji dolaze iz Brčko distrikta BiH prema državnim organima BiH, posebno prema Predsjedništvu, trebamo maksimalno ubrzati“, istakao je dr. Bećirović.

„Spreman sam da, s jedne strane u političkom smislu, na svaki mogući način podržim Brčko distrikt BiH u razvojnim i svim drugim projektima, a s druge strane, kao načelnik Općine Novi Grad Sarajevo koja ima najveći broj stanovnika, da svoje desetogodišnje iskustvo upravljanja jednom takvom zajednicom i brojnim razvojnim projektima stavim na raspolaganje, kao i svaki vid pomoći, jer je Brčko distrikt BiH sredina koja ima želju i namjeru da se razvija u svim oblastima života“, izjavio je načelnik Efendić.





Potpisan ugovor o partnerstvu između USAID BiH i Brčko distrikta BiH na implementaciji projekta „Diaspora Invest“

Gradonačelnik Brčko distrikta BiH prim. dr. Zijad Nišić, i ambasador Murphy potpisali su izjavu o saradnji Vlade SAD-a sa Brčko distriktom BiH, kao i ugovor o partnerstvu na implementaciji USAID projekta „Diaspora Invest“, što predstavlja još jedan korak ka angažmanu dijasporu u lokalni razvoj.

Pokrenut u oktobru 2022. godine, USAID-ov petogodišnji projekt „Diaspora Invest“, vrijedan 15,7 miliona dolara, podstiče saradnju između lokalnih

zajednica i dijasporu BiH i katalizira ulaganja iz dijasporu i prenos znanja kao podršku ekonomskom i društvenom razvoju BiH.

Aktivniji angažman pojedinaca iz dijasporu i poslovne zajednice ključan je za razvoj naše lokalne zajednice. Očekuje se da će takav angažman dodatno podsticati doprinose dijasporu i stvoriti pozitivne učinke prelijevanja na lokalna mala i srednja preduzeća kao i na cijelu našu lokalnu zajednicu.

Gradonačelnik Nišić učestvovao na Političkom forumu u Sarajevu

Gradonačelnik Brčko distrikta BiH prim. dr. Zijad Nišić učestvovao je u Sarajevu na Političkom forumu na visokom nivou na kojem je zajedno s predsjedavajućom Vijeća ministara BiH Borjanom Krišto dopredsjedavao evropski komesar za proširenje Oliver Varhelji. Forumu je uz gradonačelnika prisustvovao i koordinator Brčko distrikta BiH u Vijeću ministara BiH Miroslav Gavrić.

Evropska komisija je u preporuci za dodjelu kandidatskog statusa Bosni i Hercegovini navela spremnost za daljnju podršku naporima Bosne i

Hercegovine na njenom evropskom putu kroz uspostavljanje Političkog foruma na visokom nivou s ciljem praćenja provođenja koraka iz preporuke i izvještavanja o postignutom napretku.

Predsjedavajuća Krišto naglasila je da su predstavnici svih nivoa vlasti u Bosni i Hercegovini tokom današnjeg dijaloga na forumu iskazali spremnost za ispunjavanje svih 14 prioriteta iz Mišljenja Evropske komisije i provođenje neophodnih reformi s ciljem napretka Bosne i Hercegovine ka evropskim integracijama.





Градоначелник најавио 19. међународни тениски турнир „Брчко Опен 2023“

Поводом одржавања 19. међународног тениског турнира „Брчко Опен 2023“ на спортском центру „Прохема“, чији је главни покровитељ Влада Брчко дистрикта Босне и Херцеговине, почетак овог традиционалног турнира најавио је градоначелник Зијад Нишић.

„Брчко се, уз ентузијазам овог клуба, налази на свјетској мапи тениса, тако да је ово један врло важан спортски догађај на коме млади тенисери добијају и АТР бодове којима се рангирају на свјетској ранг-листи и то је њима већа мотивација него што је наградни фонд за овај тениски турнир. Тенис је спорт који доноси највише бенефита за здравље, то је један од два најздравија спорта према оцјени стручњака и ми као Влада ћемо континуирано

подржавати овакве догађаје“, изјавио је градоначелник Нишић.

„Овај турнир се у Брчком одржава по 19. пут и морам да нагласим да је ово најстарији турнир у БиХ из ове серије. У нашем граду ће боравити око 400 тенисера, њихових родитеља и пратилаца. Ове године у организацији турнира помажу нам наши дугогодишњи спонзори, међу којима је главни покровитељ Влада Брчко дистрикта БиХ, Пододјељење за привредни развој, спорт и културу и Канцеларија градоначелника. Морам да нагласим да ове године 30 земаља узима учешће на турниру и да смо у рангу многих великих градова као што су Рим, Букурешт, Адис Абеба, Анталија“, истакао је директор турнира Томислав Ђокић.

Predstavnici Distrikta u Jajcu razgovarali o turizmu

Šef Kabineta gradonačelnika Brčko distrikta Bosne i Hercegovine Nedim Hamzabegović i v. d. direktor Turističke organizacije Brčko distrikta BiH Miloš Stankić održali su sastanak u općini Jajce sa zamjenikom načelnika Općine Jajce Safetom Varenikićem i direktorima Turističke zajednice općine Jajce, JU Agencija za kulturno-historijsku i prirodnu baštinu i razvoj turističkih potencijala grada Jajca i JU „Muzej II zasjedanja AVNOJ-a“.

Sastanak je održan s ciljem razmjene iskustava iz

oblasti turizma, načini poboljšanja turističkog sadržaja, rada i ponuda turističkih objekata kao značajnog privrednog generatora. Tom prilikom posjetili su i nekoliko značajnih turističkih destinacija u općini Jajce.

Općina Jajce, jedna je od razvijenijih u BiH koja se ističe po brojnim turističkim atrakcijama, raznovrsnom turističkom ponudom, kulturno-historijskim spomenicima, prirodnim resursima te kulturno-umjetničkim sadržajem.



Vlada okončala 3. redovnu i vanrednu sjednicu

Vlada Brčko distrikta Bosne i Hercegovine na 3. redovnoj sjednici usvojila je Prijedlog odluke o dodjeli sredstava donacija Odjeljenja za privredni razvoj, sport i kulturu u ukupnom iznosu od 30.000,00 KM, u korist Udruženja poslodavaca Brčko distrikta BiH, za realizaciju projekta "Predstavljanje brčanske privrede nasajmovima - 2023".

Vlada je usvojila i Smjernice za izradu nacrtu odluke o načinu raspodjele sredstava za dodjelu donacija mjesnim zajednicama na području Distrikta, Prijedlog odluke o izmjeni Odluke o utvrđivanju sistema horizontalne koordinacije Brčko distrikta BiH u procesu evropskih integracija, Prijedlog

odluke o izmjenama i dopuni Odluke o imenovanju predstavnika Distrikta u radna tijela u okviru mehanizma koordinacije u procesu evropskih integracija i Prijedlog odluke o odobravanju nacrtu srednjoročnih makroekonomskih projekcija i fiskalne politike Distrikta za period od 2024. do 2026. godine.

Vlada Distrikta okončala je i 3. vanrednu sjednicu na kojoj je odobrila Odluku o korištenju sredstava rezerve u svrhu pomoći poplavljenim područjima u ukupnom iznosu od 90.000,00 KM. Po 30.000.00 KM dobit će Grad Bihać, Općina Čelić i Općina Kostajnica.

Gradonačelniku Nišiću predstavljen projekat o digitalnom upravljanju deminiranim zemljištem



Gradonačelnik Brčko distrikta Bosne i Hercegovine Zijad Nišić održao je sastanak s predstavnicima NVO „Posavina bez mina“ Svjetlanom Pavlović, Ivom Markovićem i Muzaferom Alihodžićem koji su s gradonačelnikom razgovarali o implementaciji projekta pod nazivom „Digitalno upravljanje deminiranim zemljištem Bosne i Hercegovine“.

Kako su pojasnili predstavnici ove NVO, radi se o pilot-projektu koji se provodi na nivou Bosne i Hercegovine, a tiče se uspostavljanja geoprostorne

baze podataka. Ista je sačinjena od podataka o deminiranim zemljištima, zemljištima koja su preostala za deminiranje, kao i podacima o žrtvama mina na području Brčko distrikta BiH.

Dosadašnja implementacija projekta finansirana je od strane Republike Koreje putem ITF Slovenije, a po završetku isti će se predati na korištenje Odjeljenju za javnu sigurnost Vlade Brčko distrikta BiH.



Уприличен пријем за ученике Основне музичке школе

Поводом успјеха којег су на међународним такмичењима освојили ученици брчанске Основне музичке школе, градоначелник Брчко дистрикта Босне и Херцеговине прим. др Зијад Нишић, замјеник градоначелника др Анто Домић, главни координатор Владе Жељко Антић и шеф Одјељења за образовање Зоран Булатовић у Градској вијећници уприличили су пријем за ученике, професоре и директора школе.

„По свом саставу наставног кадра, по броју ученика, по инструментарију, по такмичењима, резултатима, а и по традицији, ова музичка школа промовише наш град у најбољем свјетлу, те имамо интенцију да се у Брчко дистрикту БиХ успостави и средња музичка школа. Желимо да наши талентовани ученици имају могућност свој потенцијал остварити кроз даље образовање, како би могли уписати музичку академију и представљати наш град“, изјавио је градоначелник Нишић.

Директор Музичке школе Јасмин Хасић истакао је да су ученици ове године освојили укупно 25 међународних награда у којима предњаче са освојеним првим мјестима, те је најавио традиционални годишњи концерт.

„Ја могу слободно да кажем да су то највећи и

најљепши амбасадори ове локалне заједнице и Брчко дистрикт БиХ треба да буде поносан на ове ђаке који у сваком моменту на најљепши могући начин преносе име Брчко дистрикта БиХ у земље Европе. Ми ћемо сутра у Дому културе са почетком у 18.00 часова организовати годишњи концерт ученика Музичке школе, што ће бити прилика да грађани Брчко дистрикта БиХ виде и чују уживо сав тај таленат и рад који су ученици са својим професорима исказали кроз овај период, кроз ову школску годину“, истакао је директор Хасић.

„Могу да кажем да је иницијатива за оснивање Средње музичке школе жива и ми ћемо се у наредном периоду максимално потрудити да у оквиру постојеће Основне музичке школе формирамо и средњу, тако да би наши ученици који се определијеле послје основне музичке школе могли да у истом граду наставе и у средњу музичку. Надамо се да ћемо уз подршку градоначелника, Владе и Скупштине Брчко дистрикта БиХ већ у наредној 2024/2025. школској години створити предуслове да почне са радом и Средња музичка школа“, изјавио је шеф Одјељења за образовање Зоран Булатовић.

Gradonačelnik Zijad Nišić o najavljenom štrajku: Očekujemo ubrzano donošenje rješenja

Gradonačelnik Brčko distrikta Bosne i Hercegovine prim. dr. Zijad Nišić dao je izjavu o toku dosadašnjih pregovora sa Sindikatom Brčko distrikta BiH, u povodu najavljenog generalnog štrajka.

„Mi smo bili u fazi pregovora koji se zove mirenje. Jučer smo imali razgovore koji su bili vrlo korektni. Mi u Vladi smo ostali pri istom stavu, a to je da povećamo platu za 5,00% od 1. jula ove i od nove godine još 5,00% uz putne troškove koji također treba od iduće godine da se počnu isplaćivati. Prihvatili smo obavezu da se ustanovi kolektivnu ugovor do kraja ove godine. Oni su insistirali na kolektivnom ugovoru, koji će svakako biti ispunjen kao uslov, i na linearnom povećanju plate, odnosno redukovanje sa traženih 250 KM na 100 KM. Možemo reći da je to jedan pomak i razumijevanje Sindikata u odnosu na ekonomski realitet. Kada bismo to pretvorili u novčani iznos, mislim da je ponuda Vlade i ono što traže u Sindikatu apsolutno ista vrijednost i da je naš prijedlog dugoročniji benefit za zaposlene u javnoj upravi i drugim institucijama, tako da je naš stav vrlo blizak i očekujemo brzo rješenje“, kazao je gradonačelnik.

Gradonačelnik Nišić je također istakao da se, kao što je i ranije rečeno, ukida prvi platni razred te da je ponuda Vlade vrlo korektna i da se nada da do štrajka neće doći.

„Oni su insistirali da se povećaju plate najniže plaćenim pozicijama, a mi smo prihvatili da se briše prvi platni razred, a to su upravo te pozicije i da se u drugi razred instalira i treći podrazred, što će unaprijediti kategoriju najnižih plata. Mi očekujemo

da pregovori idu u dobrom pravcu, da su elementi koji upućuju na razloge za štrajk iscrpljeni i da se isti ne bi trebao desiti. Mislim da smo ponudili rješenje koje je zaista kompatibilno i sa našim budžetskim mogućnostima, a i sa zahtjevima koji su oni predložili“, istakao je gradonačelnik.

Govoreći o primjedbama rukovodstva Sindikata zašto Vlada kao poslodavac traži spisak onih koji će štrajkovati, gradonačelnik Nišić je podsjetio da se to ne čini zbog nekakvog političkog pritiska, već zbog odgovornosti Vlade da se može obezbijediti funkcionisanje zajednice.

„Mi danas imamo poplave koje ugrožavaju i stanovništvo i imovinu. Ako štrajk nije definirao i ko će biti izvršilac pojedinih poslova, mi bismo bili nespremni da odgovorimo na izazove koje nosi ova nepogoda. Moramo znati na koga možemo računati, tako da moramo znati ko će biti u funkciji i ko će biti u statusu štrajkača, ko će biti prisutan na poslu ali bez radnog angažmana“, naglasio je gradonačelnik Nišić. Komentarišući zakonske odredbe o plaćanju ljudi u štrajku, gradonačelnik Nišić je rekao da svaki kolektivni ugovor u BiH i u okruženju reguliše status štrajkača.

„Jedan član propisa u Kolektivnom ugovoru kaže da oni koji štrajkuju, koji ne rade, ne mogu imati naknade za platu osim dječijeg doplatka, tako da se ta pravna mogućnost može primijeniti i u ovom slučaju i to je nešto što imamo u svim demokratskim zemljama“, podsjetio je gradonačelnik Brčko distrikta BiH prim. dr. Zijad Nišić.





Vlada Brčko distrikta BiH razmatrala informacije u vezi s obilnim oborinama na području Distrikta

Kolegij Vlade Brčko distrikta Bosne i Hercegovine razmatrao je informacije o stanju uslijed obilnih oborina koje su zahvatile područje Distrikta.

Naime, kako je Odjel za javnu sigurnost izvijestilo na kolegiju, nakon dužeg razdoblja trajanja padavina na području Brčko distrikta BiH došlo je do povećanja vodostaja rijeka unutar slivnog područja rijeke Brke, Zovičice i rijeke Tinje, što je dovelo do materijalne štete na infrastrukturnim objektima i poljoprivrednim površinama.

Iz Odjela za poljoprivredu, šumarstvo i vodno gospodarstvo potvrdili su da su obišli slivove rijeka Brke, Zovičice i Tinje te branjenog područja naselja Krepšić i Vučilovac, gdje je došlo do plavljenja

zemljišta, oštećenja lokalnih puteva i otežanog kretanja vozilima. Odjel za poljoprivredu, šumarstvo i vodno gospodarstvo, uz koordinaciju sa Odjelom za javnu sigurnost i JP „Putevi Brčko“, obavlja radove na otklanjanju uzroka i saniranju posljedica prouzročenih bujičnim vodama.

Vodostaj rijeke Save na dan 31. svibanj 2023. godine stagnira, a što se tiče stanovništva, nema životne ugroze.

Vlada Distrikta je ujedno razmatrala preporuku o kontroliranju vode u područjima koja su zahvaćena obilnim oborinama, za što je zadužen Odjel za zdravstvo i ostale usluge.

Gradonačelnik Nišić obišao ugrožena područja

Gradonačelnik Brčko distrikta BiH prim. dr. Zijad Nišić zajedno sa šefom Odjeljenja za javnu sigurnost Bogdanom Bratićem, v. d. šefom Odsjeka civilne zaštite Mirsadom Hasanbašićem i zaposlenicima Civilne zaštite nadležnim za pitanja klizišta obišao je dijelove Distrikta koji su najugroženiji novonastalim klizištima.

Obišli su lokacije u Donjem Breziku gdje je ugroženo više stambenih objekata i gdje će Vlada

preko Odjeljenja za javnu sigurnost u narednim danima provoditi hitne mjere zaštite navedenih objekata.

Na ostalim lokacijama gdje su direktno ugroženi stambeni objekti kao npr. na lokaciji u Šatorovićima, Vlada će također kroz nadležno odjeljenje u narednom periodu poduzimati mjere na zaštiti materijalnih dobara i ljudi.

Utvrđena deficitarna zanimanja za novu školsku godinu

Vlada Brčko distrikta Bosne i Hercegovine na redovitoj sjednici usvojila je Odluku o odobravanju tekuće donacije i usvajanju programa utroška sredstava za financiranje udruga građana Brčko distrikta Bosne i Hercegovine proisteklih iz proteklih ratova XX. stoljeća od posebnog interesa za 2023. godinu na prijedlog Odjela za stručne i administrativne poslove.

Kako je navedeno u Odluci, donacija se odobrava neprofitnim organizacijama, za financiranje udruga građana Brčko distrikta Bosne i Hercegovine koja za cilj imaju zaštitu prava i interesa demobiliziranih branitelja, definiranje, ostvarivanje i praćenje ostvarivanja prava branitelja zarobljenih, poginulih i nestalih branitelja i civilnih žrtava proisteklih iz proteklih ratova XX. stoljeća od posebnog interesa za 2023. godinu u ukupnom iznosu od 390.000,00 KM.

Na prijedlog Odjela za obrazovanje usvojena je Odluka o utvrđivanju deficitarnih zanimanja za

školsku 2023. / 2024. godinu, a to su zanimanja III. stupnja: zavarivač-varilac i instalater / autolimar (smjer strojarstvo i obrada metala), električar (elektrotehnika), vozač motornih vozila (promet) i kuhar-kuvar (Ugostiteljstvo i turizam).

Vlada je također usvojila Odluku o uspostavljanju i ažuriranju Registra dijasporne Brčko distrikta Bosne i Hercegovine na prijedlog Odjela za europske integracije i međunarodnu suradnju.

Svrha uspostavljanja Registra je sustavno prikupljanje, vođenje i obrada podataka o fizičkim i pravnim osobama u dijaspori radi razvijanja i jačanja suradnje Distrikta sa dijasporom te međusobnog povezivanja i suradnje dijasporne porijeklom iz Distrikta. Subjekti upisa u spomenuti Registar su fizičke osobe koja imaju prebivalište ili boravište u dijaspori, a koje su porijeklom iz Distrikta i pravne osobe čiji je vlasnik ili utemeljitelj porijeklom iz Distrikta.



Gradonačelnik posjetio vatrogasce povodom Međunarodnog dana vatrogasaca



Povodom Međunarodnog dana vatrogasaca gradonačelnik Brčko distrikta Bosne i Hercegovine prim. dr. Zijad Nišić zajedno sa šefom Odjeljenja za javnu sigurnost Vlade Brčko distrikta BiH Bogdanom Bratićem posjetio je vatrogasce.

Gradonačelnik je izrazio svoju zahvalnost vatrogascima te im čestitao na njihovom danu, ističući da je njihova hrabrost i predanost inspiracija svima.



На Заједничкој сједници разговарано о Брчко дистрикту БиХ

Координатор Канцеларије Брчко дистрикта Босне и Херцеговине при Савјету министара БиХ Мирослав Гаврић учествовао је на заједничкој сједници Владе Републике Хрватске и Савјета министара Босне и Херцеговине, која је одржана данас у згради Националне и свеучилишне књижнице у Загребу.

Заједничка сједница састојала се од низа закључака које су у заједничком интересу Хрватске и Босне и Херцеговине, а којима ће се додатно унаприједити билатерални

односи ових држава.

Тако су на дневном реду били и разговори о двјема важним темама које се тичу Брчко дистрикта БиХ: Споразум између Савјета министара БиХ и Владе Републике Хрватске о реконструкцији постојећег моста Брчко (БиХ) – Гуња (ХР), као и пројекат изградње новог моста Брчко Гуња.

Заједничка сједница одржана је по други пут у мандату премијера Хрватске, Андреја Пленковића.



Vlada Brčko distrikta BiH odobrila Rebalans za 2023. godinu

Povodom Prijedloga o izmjeni proračuna Brčko distrikta Bosne i Hercegovine za 2023. godinu, Vlada Brčko distrikta održala je izvanrednu sjednicu na kojoj je izmjena odobrena.

Izmjenama Proračuna Brčko distrikta BiH za 2023. godinu, proračun je uvećan za 40.576.539,85 KM od čega se na uvećanje prihoda odnosi 5.062.997,49 KM, a na uvećanje financiranja 35.513.542,36 KM, tako da Proračun Brčko distrikta BiH za 2023. godinu, uz ove izmjene, iznosi 322.930.300,84 KM.



Vlada usvojila prijedloge Odjela za gospodarski razvitak, šport i kulturu

Vlada Brčko distrikta Bosne i Hercegovine održala je 7. izvanrednu sjednicu na kojoj je usvojila dva prijedloga Odjela za gospodarski razvitak, šport i kulturu.

Tako je usvojena Odluka o odobravanju Programa utroška sredstava za financiranje odnosno sufinanciranje programa odnosno projekata od javnog interesa za manifestacije iz područja sporta i kulture. Kriteriji za raspodjelu sredstava u ovom programu odnose se, između ostalog, na procjenu usklađenosti ciljeva programa odnosno projekata od javnog interesa s ciljevima u prioritarnim područjima te strateškim i drugim planskim dokumentima razvoja Distrikta i planovima Odjela,

kvalitet dosadašnjeg rada, uspjesi i iskustva, kao i neposredna društvena korist za zajednicu.

Usvojena je također Odluka o odobravanju programa o izmjeni programa utroška sredstava donacija Odjela za gospodarski razvitak, šport i kulturu za 2023. godinu.

Vlada je također okončala 7. redovitu sjednicu odobrivši prijedlog Odjela za komunalne poslove koji se tiče smjernica za izradu Nacrta zakona o upravljanju otpadom Brčko distrikta BiH kojim će se, između ostalog, upravljanje otpadom urediti na ekološki prihvatljiv način, te će se definirati način i upravljanje ambalažnog, elektroničkog otpada kao i upravljanje otpadnim gumama.

Održan sastanak čelnika Distrikta s arbitrom Williamsonom i supervizorom Mennutijem

U Gradskoj vijećnici održan je radni sastanak gradonačelnika Brčko distrikta BiH prim. dr. Zijada Nišića, zamjenika gradonačelnika dr. Ante Domića, predsjednika Skupštine Siniše Milića i potpredsjednika Ive Filipovića s predsjedavajućim arbitrom Arbitražnog tribunala za Brčko distrikt BiH Johnom Clintom Williamsonom i supervizorom za Brčko Jonathanom Mennutijem. Gradonačelnik Nišić današnji sastanak je opisao kao rekapitulaciju razvoja ove lokalne zajednice.

„Mogu reći da se Distrikt od svog uspostavljanja pokazao kao dobar model funkcionisanja, model koji pokazuje kako treba da izgleda BiH i praktično može da posluži kao primjer drugim postkonfliktnim sredinama, jer se vodi najvažnijom pretpostavkom za razvoj demokratije, odnosno multietničnošću kao osnovom svog razvoja“, izjavio je Nišić.

„Namjera mojih periodičnih posjeta Distriktu je napraviti jednu procjenu razvoja situacije i utvrdimo stepen poštivanja Konačne odluke. U stalnom kontaktu sam sa Supervizorom, međutim, ovo je prilika da iz prve ruke čujem informacije o stanju na ovom području. Ovo je također bila

prilika da se sastanem sa čelnicima Distrikta nakon formiranja nove Vlade i čujem kako funkcioniše novi politički poredak“, izjavio je arbitar Williamson, te dodao da se na sastanku razgovaralo o ekonomskom razvoju, vladavini prava i borbi protiv korupcije u Brčko distriktu BiH.

„Moj tim i ja smo neprekidno angažovani na pitanjima koja se tiču provođenja reformi u Brčkom, tako da je i posjeta predsjedavajućeg arbitra bila izuzetna prilika i za predstavnike tijela vlasti u Brčkom da još jednom potvrde svoje opredjeljenje u namjeri da nastave sa provedbom reformi koje su započete i plana reformi koje imamo ovdje. Smatramo da je od osnovnog značaja da organi vlasti nastave sa provođenjem reformi i s aktivnostima koje su započete kako bi, između ostalog, omogućili i građanima Brčko distrikta da imaju koristi od međunarodnih programa i sredstava kojima se podržavaju jako bitni projekti poput modernizacije Luke i poboljšanja sustava napajanja električnom energijom, vodosnabdjevanja, te odlaganja otpada“, istakao je supervizor Mennuti.



Vlada Brčko distrikta BiH i Sindikat postigli dogovor o prekidu štrajka



Gradonačelnik Brčko distrikta Bosne i Hercegovine Zijad Nišić i predsjednik Sindikata Brčko Igor Babić u sali Gradske vijećnice obratili su se medijima u vezi sa postizanjem dogovora o prekidu štrajka. Prisutni su bili i zamjenik gradonačelnika dr. Anto Domić i predsjednik Skupštine Siniša Milić.

Kako je u svom uvodu kazao gradonačelnik Nišić, Vlada je sa predstavnicima Sindikata postigla dogovor o prekidu štrajka koji je trajao 45 dana, te se osvrnuo na njihove zahtjeve.

„Prvobitni zahtjev Sindikata se sveo na dva uslova, a to je linearno povećanje plata, prvobitno za 250 KM, a kasnije za 100 KM i da se ustanovi kolektivni ugovor. Vlada je imala druga rješenja koja su u konačnici udovoljila ovim zahtjevima, tako da smo ustanovili neke mjere koje smo predložili kao uslov da se prekine štrajk. Dogovoreno je da osnovica za obračun plata bude povećana sa 667 KM na 700 KM“, kazao je Nišić.

On je dodao da će se od 1. januara 2024. godine plate povećati za još 5,00%, instalirati platni razred 1 u

platni razred 2, te da će jednokratna novčana pomoć biti rezervisana za zaposlenike čija je plata do 1.200,00 KM kao i da će kolektivni ugovor biti ustanovljen.

„Vlada je u toku ovog cijelog procesa partner, a ne neko ko se suprotstavlja interesu radnika, tako da će radno-pravni status radnika u Brčko distriktu BiH biti popravljen“, istakao je Nišić.

„Mi iz Sindikata smo na našem predsjedništvu donosili neke smjernice koje su dovele do stvaranja uslova za potpisivanje sporazuma o prekidu generalnog štrajka i nadamo se potpisivanju istog narednih dana. Drago nam je što je Vlada izašla u susret kroz komunikaciju i razgovore i što smo došli do toga da ćemo potpisati sporazum i okončati generalni štrajk. Ovo je prvi korak Sindikata i u narednim koracima koji će se ticati podizanja radničkih prava, Sindikat će biti partner Vladi kako bismo na području Distrikta imali opći kolektivni ugovor“, izjavio je predsjednik Sindikata Igor Babić.



Kancelarija gradonačelnika, Sekretarijat Vlade Brčko distrikta BiH,
Sektor za informisanje Vlade Brčko distrikta BiH
Bulevar mira 1, 76100 Brčko distrikt BiH

vlada.bdcentral.net